

續
文
獻
通
考

續文獻通考卷之八十一

皇明進士雲間王圻纂輯

節義考 友行

虞舜之弟象日以殺舜爲事謀取其弓矢琴張使二嫂治
朕棲象往入舜宮舜見其來而喜之曰惟茲臣庶汝其
于予治及爲天子封之有庠使吏代之治而納其貢稅
欲常常而見之故源源而來

周

泰伯王季兄也王季生昌有聖德太王欲傳位季歷以及
昌泰伯乃託爲採藥去之荆蠻

伯夷叔齊孤竹君之二子孤竹君欲立叔齊爲後及父卒

齊讓于兄逃而去夷曰父命不可違亦逃而去國人立其中子

周公武王弟也武王有疾周公爲壇告于太王王季文王願以身代卜神許之武王疾愈而周公亦無恙

春秋 衛世子伋公子壽俱衛宣公子初宣公娶夷姜生世子伋爲子娶于齊聞其美自取之是爲宣姜生壽及朔朔有寵乃與宣姜慝伋于公公令伋如齊使盜先待于隘而殺之壽知之以告伋曰君命也不可以逃壽竊其節而先往盜殺之伋至曰君命殺我壽何罪盜又殺之國人傷之而賦乘舟

宋 目夷字子魚襄公庶兄初桓公疾襄公爲太子固請

曰目夷長且仁君其立之公命目夷目夷辭曰能以國讓仁孰大焉臣不及也且又不順遂退而避焉

漢

劉紆宣帝之曾孫紆早失母同產弟原鄉侯平尚幼紆親自鞠養常與其卧起飲食及成人未嘗離左右平病卒紆哭泣嘔血數月亦歿

韋玄成扶陽侯韋賢子也賢薨長子弘有罪下獄家人矯賢令以次子玄成爲後玄成深知非賢雅意卽佯狂不應詔宣帝乃用爲河南太守

兒萌齊人兄弟並見執于赤眉將殺食之萌叩頭乞以身代兄賊哀之咸釋去

淳于恭北海淳于人王莽末歲饑兵起恭兄崇將爲盜所烹恭請代得與俱免

車成字子威梁郡人也兄弟並見執於赤眉將殺食之成叩頭乞以身代賊哀兩釋之

王琳字巨尉汝南人年十餘歲父母俱喪遭大亂鄉里逃竄惟琳兄弟獨守塚廬號泣不絕弟季出遇赤眉將殺之琳自縛請先季死賊矜而放遣

趙孝字長平沛國蘄人王莽末天下亂人相食孝弟禮爲饑賊所得孝聞之卽自縛詣賊曰禮久餓羸瘦不如孝肥賊大驚並放之顯宗聞其行詔拜諫議大夫遷長樂縣尉

東漢

光武兄劉縯字伯升爲更始所殺光武時爲蕭王枕席常有涕泣處後卽帝位傷縯功業不就撫育二子章與恩愛甚篤以其少貴欲令親更事使章試守平陰令興緣氏令後章遷梁郡太守興遷弘農太守

薛包字孟嘗汝南人也弟子求分財異居包不能止乃中分其財奴婢引其老者曰與我共事久若不能使也田廬取其荒頓者曰吾少時所理意所戀也器物取朽敗者曰吾素所服食身口所安也弟子數破其產輒復給之建武中公車特徵至拜侍中稱疾不起有詔賜告歸加禮如毛義

劉平字公字楚郡彭城人也本名曠顯宗時改爲平更始
時天下亂平弟仲爲賊所殺仲遺腹女始一歲平抱仲
女而棄其子母欲還取之平不聽曰力不能兩活仲不
可以絕類遂去不顧與母俱匿野澤中平朝出求食逢
餓賊將烹之平叩頭曰今旦爲老母求菜老母待曠爲
命願得必歸食母畢還就死因涕泣賊見其至誠哀而
遣之食母畢謂母曰與賊期死不可不往遂復詣賊請
死賊驚駭放歸顯宗初鍾離意上書薦平詔徵平特賜
辦裝錢至拜議郎

姜肱字伯淮彭城人兄弟三人爲長枕大被共相寢處不
入私室

韓稜字伯師舞陽人少孤養母弟以孝友稱及壯推父餘財數百萬與從昆弟鄉里益高之章帝朝累官司司空

劉愷字伯豫故居巢侯般子也愷當襲般爵固讓與弟憲遁逃避封和帝時詔聽憲嗣爵徵愷拜爲郎

郭賀父鎮順帝初以定策功封定相侯父歿當嗣爵讓小弟時而逃積數年詔大鴻臚下州郡追之賀不得已乃出受封

孔融字文舉魯人幼時與諸兄食菓恒取小者兄問之曰我小兒法當取小者後張儉投其兄褒褒適他出融匿之事覺融曰保匿舍亡者融也當任其罪褒曰本來求我非弟之過吏問其母曰家事任長妾當其辜一門爭

死後竟坐褒死

李充字大遜陳留人家貧兄弟同居妻挾其私欲分異充乃白母言其妻離間之罪遂黜之

繆彤召陵人少孤兄弟四人皆同財產及各娶婦遂求分異且數有鬭爭之言彤深懷憤歎拵戶自撻曰繆彤汝修身謹行學聖人之道將以整齊風俗柰何不能正其家弟及諸婦聞之悉叩頭謝罪遂更爲敦睦之行

丁鴻字孝公定陵人父琳從光武以功封陵陽侯父歿當襲爵讓于弟教授里中

韓元長潁川人身處卿佐八十而終兄弟同居至于沒齒晉陶潛嘗以訓其子

許武陽美人初舉孝廉以二弟宴普未顯欲令成名乃析
貲產爲之自取膏腴二弟所得皆瘠鄉人鄙其貪稱二
弟克遜宴普並荷選舉武泣謂忠淵曰向以二弟年長
未預榮祿故分財取譏今殖產數倍悉以推二弟郡中
翕然稱譽

許荆武之孫兄子世報仇殺人怨者操兵攻之荆出跪曰
世無狀咎在荆不能訓導兄止一子死卽滅絕願代之
怨者扶荆起曰許掾郡中稱賢吾何敢犯遂舍之

王覽臨沂人母朱氏遇其兄祥無道覽年數歲見祥被楚
撻輒涕泣抱持至于成童每諫其母其母少止究虐朱
屢以非理使祥覽與祥俱又虐使祥妻覽妻亦趨而共

之朱患之乃止

鄧攸字伯道襄陵人永嘉末没于石勒過泗水攸以牛馬負妻子而逃又遇賊掠其牛馬步走擔其兒及弟子綏度不能兩全乃謂其妻曰吾弟早亡惟有一息理不可絕止應自棄吾兒耳幸而得存後當有子妻泣從之乃棄其子而去卒以無嗣官至太尉時人哀之爲之語曰天道無知使鄧伯道無兒子綏服攸喪三年

友姊者邵陽任延壽之妻也字季兒有三子季兒兄季宗與延壽爭葬父事延壽與其友田建陰殺季宗建獨坐死延壽會赦乃以告季兒季兒曰嘻今乃語我遂振衣欲去問曰所與共殺吾兄者爲誰延壽曰田建田建已

死獨我當坐汝殺我而已季兒曰殺夫不義事兄之仇亦不義延壽曰吾不敢留汝願以車馬及家財盡送汝聽汝所之季兒曰吾當安之與子同枕席而使殺吾兄何面目以生而戴天履地乎乃告其大女曰汝父殺吾兄義不可以留又終不復嫁矣吾去汝而死善視汝兩弟遂自縊而死焉翊王讓聞之令縣復其三子而表其墓

晉

庾袞字叔褒父世作官費以養母母終服喪居於墓側武帝咸寧中大疫二兄俱亡次兄毗復殆癘氣方熾諸父母兄弟皆出處於外袞獨留不去諸父兄強之乃曰袞

性不畏病遂親自扶持晝夜不眠復撫亡者柩哀臨不輟如此十有餘旬疫勢既歇家人乃反毗病得痊家亦無恙父老咸曰異哉此子守人所不能行始知癘疫之不能染人也

丘景賓字彥光吳興人性孝友父卒悉讓產與兄甘于淡泊以終其身

荀崧字景猷或之玄孫朝廷以臨淮公顗胤絕詔令崧子襲封崧哀從弟旭之子序孤微乃讓封論者稱焉

劉宋 孫棘彭城人宋廢三五丁弟薩應充行坐違期不至當刑棘乞以身代薩薩又自引太守張岱疑其不實以棘薩各置一處報之聽其相代顏色並悅甘心赴死

妻許又寄語屬棘君當門戶豈可委罪小郎且大家臨
亡以小郎屬君尚未與娶君已有二兒死復何恨岱依
事表上孝武詔特原罪州加辟命并賜帛二十匹

顏含字弘都琅邪人少以孝聞親終兩兄繼沒次嫂樊氏
失明含課勵家人盡心奉養醫人疏方須蚺蛇膽徧求
不可得含憂歎累時嘗晝獨坐忽有一青衣童子持青
囊授含開視乃蛇膽也童子逡巡出戶化青鳥飛去得
膽藥成嫂病卽愈由是著名官累遷侍中以年老遜位
成帝美其素行就加右光祿大夫

袁象字緯才仕宋爲武陵內史兄顗見誅明帝投屍于江
象與舊奴一人微服求屍四十餘日乃得密瘞石頭後

同尋改葬焉

褚賁字蔚先父淵封南康郡公昇明六年賁當襲爵上表讓封與弟泰泰讓封還賁于濟詔許之

齊 吳欣之江陰利城人宋元嘉末弟慰之隨王誕起義兵會華欽軍至衆皆駭散慰之獨留被執將殺欣之詣欽請代辭甚哀切兄弟皆見原建元初詔旌之

吳達之義與人嫂亡備直給喪具從弟欽伯夫婦歲凶被略達之有田數畝售以贖之還其財產郡縣倖爲簿固遜于兄又以先世舊田讓與族弟弟不受棄爲田建元初表其門閭

蕭梁 陶子綽字海育丹陽林陵人兄尚爲倖臣所怨被

繫子鏘公私緣訴流血稽顙行路嗟傷兄卒得釋母終
居喪盡禮與范雲隣雲每聞其哭聲必動容改色母嗜
蓴母歿後恒以供奠武帝義師初至是年冬營蓴不得
子鏘痛恨慟哭而絕久之乃蘇遂長斷蓴菜

張松建康人兄坐罪松與弟各請代其死縣以讞上武帝
以其孝義特免之

韋鼎其先杜陵人侯景之亂鼎兄昂于京口戰死負屍求
棺無所得哀憤慟哭見江中有物流至往視乃新棺也
因以充殮元帝歎其爲積誠所感云

北魏 楊播華陰人家世淳厚並敦義讓昆季相事有如
父子與弟津椿旦則聚于廳堂終日相對未嘗入內有

一美味不集不食廳堂間往往幙幔隔障爲寢息之所
時就休偃還共談笑播旣卒椿年老曾他處醉歸津扶
持還室假寢閣前承候安否椿津年過六十並登台輔
而津常旦暮參問子姪羅階下椿不命坐津不敢坐椿
每近出或日斜不至津不先飯椿還然後共食食則津
親授匙箸味皆先嘗椿命食然後食津爲肆州椿在京
兆每有四時嘉味輒因使次第附之若或未寄不先人
口一家之內男女百口總服同爨庭無間言

劉渢南陽人與弟漁極友愛漁爲遙光諮議求出爲丹陽
丞及遙光敗渢曰吾爲人作吏不避死漁曰我何忍獨
生俱見殺

周 杜叔毘字子弼其先京兆杜陵人早歲而孤事母以
孝聞兄君錫爲曹策所害叔毘內懷憤惋志在復讐然
恐坐及其母沉吟積時母知其意謂叔毘曰曹策早死
吾以夕歿亦所甘心叔毘遂白日手刃策于京城斷首
刳腹解其肢體然後縛請就戮文帝嘉其志氣特命舍
之遭母憂哀毀骨立殆不勝喪

隋 郎方貴高祖開皇時人常於淮水津所寄渡舟人怒
之搥方貴臂折至家從弟雙貴問知之恚恨遂向津毆
殺船人津者執送之縣以方貴爲首當死雙貴從坐當
流兄弟爭爲首坐縣司不能斷送詣州兄弟各引死州
不能定二人爭欲赴水死州以狀聞上異之特原其罪

表其門閭賜物百段

李知本元氏人事親篤孝與弟知隱雍順子孫百數庭無
間言大業末盜賊過閭不入且相戒曰無犯義門往依
者五百餘家皆免患

牛弘鴝鵒人隋時爲吏部尚書弟弼好酒而酗嘗醉射殺
弘駕車牛弘還宅其子迎謂弘曰叔射殺牛弘聞無所
怪問直答曰作脯坐定其妻又曰叔射殺牛大是異事
弘曰已知顏色自若讀書不輟

田真醴泉人兄弟三人田廣田慶皆同財產及各娶妻諸
婦遂求分異堂前有一紫荆樹茂甚議分爲三忽一夕
枯死真驚謂弟曰木猶如此况兄弟乎更合如初紫荆

復茂

唐玄宗名隆基睿宗第三子初封楚王長兄宋王成器次
申王撝弟岐王隆範次薛王隆業次隋王隆悌睿宗將
立成器爲太子成器辭曰時平則先嫡長世亂則先有
功楚王有定難功臣以死請乃立楚王爲太子太子嘗
製長枕大被將與諸王共之睿宗聞甚喜及卽位賜五
王宅環列宮側天子于宮西南置樓西曰花萼相輝之
樓南曰勤政務本之樓聞諸王作樂必亟召升樓與同
榻坐或就幸第賦詩宴嬉賜金帛侑歡時有鵲鴝千數
集麟德殿廷樹翔樓浹日左清道率府長史魏光乘作
頌以爲天子友悌之祥帝喜亦爲作頌又嘗爲薛王者

藥風回熱鬚左右驚救帝曰但使王飲此藥而愈鬚何足惜論者謂帝之友愛近世帝王莫及也

趙弘智新安人性篤孝太宗時累官黃門侍郎兼弘文館學士出爲萊州刺史事兄弘安如父兄卒慟哀過期無兄子慈均所生玄孫來章以孝聞

元魯山字紫芝河南人爲魯山令以不及親在而娶遂不肯婚曰兄有子先人得祀吾何娶焉乃自乳其姪乳爲生液

李勣字懋功曹州離狐人貴爲僕射其姊病必親爲燃火煮粥火燎其鬚姊曰僕妾多矣何自苦如是勣曰豈爲無人耶顧姊年老勣亦老雖欲數爲姊煮粥復可得乎

王遇晉陵人肅宗時與弟遐同行中道爲賊所執兄弟爭死賊感其誼縱之

陸南金吳人仕爲太常奉禮郎開元初少卿盧崇道以罪亡命南金納之事泄詔侍御史王旭按捕南金當重法弟趙壁詣旭自言匿崇道者我也請死南金固言弟自誣不情旭怪之趙壁曰母未葬妹未歸兄能辦之我生無益不如死旭驚上狀玄宗所宥之

李渭越州蕭山縣人文宗太和七年三月浙江東道奏渭幼失父母與兄二人同居兄病渭割股療之因瘥後兩兄俱死奉寡嫂孤姪二十餘年衣食無偏庄田租稅渭自主辦資財完鑰寡嫂掌之孤姪婦孫共三十三人其

家頻生芝草詔旌表之

陳饒奴饒州人年十二父母俱亡值歲大饑或教其分弟妹可全性命饒奴流涕再三日丐於市以相全養刺史李復異之給以資儲署其門曰孝友童子

韋嗣立字延構與兄承慶異母性友悌母每笞承慶輒解衣求代母不聽即遣奴自捶母感悟爲均愛世比晉王覽云

章全益梓州涪城人少孤爲兄全啓所鞠母病全啓割股膳母而愈及全啓亡全益服斬衰斷手一指以報人號章孝子卒年九十八

第五 李氏妻王阿足深州鹿城人早孤無兄弟歸李氏

數歲夫死無子以孀姊高年無供養乃不忍嫁晝耕夜績能辦生事餘二十年姊亡葬送如禮鄉人服其義爭遣妻女師其風訓以壽終于家

南唐 徐鉉廣陵人與弟錯極友愛鉉以直諫被逐錯思念涕泣至于失心其母爲請于李主曰願令錯與鉉俱貶以綏其疾李主哀之召鉉還而錯已病昏瞶不識人猶自記兄背有黑痣發衣驗之遂抱噬其痣號哭幾絕

宋

太祖性友愛嘗稱弟晉王光義龍行虎步他日必爲太平天子晉王有疾灸之覺痛帝亦取艾自灸以分其痛

王德聰婺源人孝友信義有田百頃家食數百人同居七

十餘年縣宰劉定上其事仁宗賜扁曰孝友信義之門
趙唐兄弟五人同居家口六十人共一爨父母相繼而歿
唐哀毀殯塋以禮歲時祭祀如事生旌表其門

王旦字子明封魏國公洛人第旭傲不可訓一日遇冬至
祠家廟列百壺于堂第皆擊破之家人惶駭魏公忽自
外至見酒流徧地不可行公無一言但攝衣步入第因
感悟爲善

張存舉進士天禧中累官侍御史積至禮戶尚書性孝友
收恤宗族不使一人失所卒謚恭安司馬光其婿也

韓琦安陽人合族百口衣食均等無異嫁孤女十餘人養
育諸姪比于已子所得恩例先及旁族逮其終子有

永未官者

朱壽昌天長人尋母旣得迎其同母弟妹以歸母卒撫其弟妹益篤爲買田居之其餘宗族尤盡恩意嫁兄弟之孤女二人葬其不能葬者十餘喪

司馬溫公夏縣人與其兄伯康友愛尤篤伯康年將八十公奉之如嚴父保之如嬰兒食少頃則問曰得無饑乎天少冷則撫其背曰衣得無薄乎

趙抃字閱道西安人官至太子少師平生不治貨產不畜聲伎嫁兄弟之女十數撫孤女二十餘人施德惇食不可勝數

杜衍字世昌山陰人前母有二子不孝弟其母改適河陽

錢氏祖母卒衍年十五六二兄遇之無狀至引劍斫之傷腦出血數升其姑匿之僅而得免乃詣河陽歸其母繼父不之容往來孟洛間貧甚傭書自資後舉進士及貴顯其長兄猶存待遇甚有厚禮二兄及錢氏姑子孫受衍蔭補官者數人仍皆爲之嫁娶俸祿所入給宗族賙人難至其歸日無屋以居寓南京驛舍者久之

范仲淹字希文蘇州人爲叅政時告諸子曰吾貧時與汝母養吾親汝母躬執爨而吾親甘旨未嘗乏也今得厚祿欲以養親親不在矣吾所恨者忍令若曹享富貴之樂于是俸祿常均于族人並置義田貽後

徐亨桐廬人宣和初方臘寇起亨兄爲賊所執亨叩頭告

曰家有老母兄能養請代其死賊舍其兄而殺亨鄉人義之

李悅娶之東陽人宜和庚子方臘叛其黨冠縣悅與兄匿灌莽中爲盜所執欲兵之悅亟趨出願以身代昆弟爭相就死冠義之爲荷戈而去

陸時雍淳安人幼孤貧與兄力樵以養母稍長補郡學生念母兄食不給語掌膳曰吾日飯勿盡炊願輟一膳遺母自以一膳分爲晨午其苦節孝養如此後登宣和三年進士第仕至知建昌軍復請以恩官其兄子

張恪金壇人性孝友母喪祥禪逾年猶不御酒肉兄有奇疾或云人肉可療乃割股以進姪有緣役破家及坐事

沒產者皆贖還以居之

湯從彥金壇人天性友悌念兄以使事得罪而卒推已田以益之得任子恩卽與其孫徹子裝以嫁其幼女時皆高之

丁公億醴陵人靖康間公億與兄公萬避寇于鄉賊遇公萬縛之將就炮烙公億號呼願以身代賊義而舍之一家獲全

黃甫南安人與弟旦友恭交至每有疾病相與盡誠叩天以祈保祐後皆登第

許元如皋人世有孝德其父歿子當得一官兄弟相讓久之卒以讓元愛撫兄弟諸子歲當上計京師弟之子病

元不忍去遂以俱行家素貧罄貲走四方求醫藥憂戚不自勝

祝確歎人親喪廬墓終制而歸一弟一兄繼死黑河不憚萬里徒步以歸其喪所含輒悲哀上食如禮歲大疫親舊有舉室病卧者每旦必携粥藥遍飲食之日以爲常曾輩字子固南豐人性孝友撫四弟九妹于委廢單弱之中宦學婚嫁一出其力

譚煥始與人嘗預薦書當父任力辭遜于弟後舉八行首大觀中復登進士第官至朝散大夫

許遂宣城人早孤事母以孝聞弟述亦孝謹衣食必推其兄遂子瑜述子元並以孝友稱

黃居仁字安懿鄞人紹興中進士性孝友其在官奉叔父及甥妹以行析田二頃爲義莊以贍宗姻

單煦平原人舉進士官至光祿卿兄熙嘗毆人至死煦曰家貧親老仰熙以養義當代死卽趨闕所待捕已而死者甦驚問之煦以情告其人感嘆遂輟訟

許儉字勿度閩福清人不畜私財不置私器三世不分異庭無間言鄭性之嘗大書孝友二字以扁其堂

鄭德珪德璋浦江人孝友天至德璋爲仇家陷以死罪當會遠揚州德珪哀弟之見誣乃陽謂曰彼欲害我也何預爾事我往則姦狀白卽治行德璋追至諸暨道中兄弟相持頓足哭爭欲就死德珪遂紿以無往夜將半從

間道逸去德璋復追至廣陵德珪已斃于獄璋慟絕者
數四負骨歸葬廬墓再替每一悲號烏鳥皆翔集不食
鄭清之字德源鄞人母胡氏將就蓐三日鵲鳴甫生嫡母
欲不舉丘嫂邊氏請于舅姑願已乳之既貴奉丘嫂如
母卒爲服替以報

余天錫字純父昌國人兄弟友恭方貧時率更衣以出終
歲同衾及晚貴盛復約以昭穆同葬

王士奇字永叔福安人初以鄉薦赴省試聞弟計不赴卽
往蜀護其喪以歸凡六年而後就試當得官以母老丐
祠當國者高其行畀以堂除凡二十三考方注莆田法
曹真德秀語當路曰王法曹文行俱美尤孝于親當于

古人中求之後以奉議郎賜緋衣致仕

項克龍泉人幼承兄洵美訓誨成立當析產克言于有司願盡以遜兄荅其教育之恩知郡王洋上其事詔旌其門

汪宗臣婺源人入元不仕孝友天至于姓同居庭無間言元

章夢賢上海人至元中薦授管田提舉以父母蚤亡伯兄多疾卽棄官歸終身不仕事其兄如父兄歿撫其孤如子閨門二百餘口無間言

楊仁廬州廬江人至元中兀朮兵南下仁家爲所掠父被殺母及兄弟皆散去仁年七歲鬻爲汴人李子安奴力

作二十餘年子安憐之縱爲良仁蹤跡得母于潁州兄
于睢州弟于邯鄲皆爲役尚無恙乃徧懇親故貸鈔百
錠歷詣諸所求贖之大小二十餘口復聚居爲良孝友
甚篤大德二年旌其家

陳忠壽光人兄弟四人同居孝友大德八年旌

吳傑博興人兄弟四人同居五十年又建義塾延師教鄉
閭子弟知州郭克以聞旌表

元善大名人兄弟五人因貧流散江淮久之客死至大四
年善往尋其骸骨父兄弟姪等一十五喪而歸改葬祖
父母以諸喪序列附塋次有司以聞詔旌其廬

王榮句容人爲人孝友五世同居時歲荒有饑者出粟以

賑死者置棺以殮延祐間旌其門

吳好直蒲城人父歿事繼母孝兄弟求分財好直勸諭不能止卽以已所當得悉推與之出從師澹泊二十年無悔詔加旌表

劉德泉杞縣人早喪母父榮再娶王氏生二子居敬居元德泉甚撫之及王氏卒益相友愛至元末歲饑父欲使析居德泉泣止乃各受其業以去父之父卒兄弟相約同爨和好如初郡守以聞詔表其閭

朱顯直定人至元間祖父已分財至顯念姪彥冲等年幼無恃謂弟耀曰父子兄弟本同一氣可異處乎乃會拜祖墓下取分券焚之復同居

劉廷讓大寧武平人至順初北方兵起廷讓挈家避山中
有幼弟方乳母王氏置于懷兵急廷讓乃棄已子一手
抱幼弟一手扶母疾驅得免事聞旌之

長壽父帖住官平章政事生五子長山壽早卒次卽長壽
次永壽福壽忙古海牙元統間帖住沒長壽哀毀盡禮
服闋當廕叙與弟羅拜母前願以職讓永壽永壽讓福
壽福壽曰二兄能讓吾獨不能耶以讓忙古海牙母從
之

梁外僧河中人至大間外僧親喪廬墓兄那海爲奧魯官
自以嘗遠仕不得養親卽棄職舉外僧代之人稱外僧
能孝那海能義又有畏吾氏秋秋及濠州高中嘉定武

進皆以侍親不願仕以祖父廕讓叔父昆弟云

皆汝道齊河人居父喪盡孝道母高氏疾晝夜不去側一日母私授以金珠令勿使兄弟知汝道泣拜曰父母艱難成家今田宅牛羊已多汝道恨無以報大恩尚敢受此以重不孝之罪乎竟辭之母卒哀毀不御肉酒二弟將析居悉以美田廬讓之二弟早世撫諸孤如已子甄城柴郁陳舜咨俱蒲城人皆能孝友以已產分讓兄弟縣令言狀均蒙旌表

吳思達蔚州人仕爲開平主簿兄弟六人常以父命析居延祐間父卒治葬畢泣告其母曰吾兄弟別處十餘年今多破產以一母所生忍使苦樂不均耶卽以家財代

償其逋更復其居事聞表其閭

吳淳字伯善兄枕席幾二十年吳中被兵家人奔潰淳獨侍兄不去復遇亂兵淳以身蔽兄被三十餘鎗昏臥于地兄竟兵死淳稍甦遂入餘杭山鬻墨以終

陳謙字子平父病革思鰈父歿遂終身不食鰈事兄訓甚謹訓爲張士誠兵逼拜不屈遂刃其冒謙以身翼蔽之并被害

諸汝諧濮州人父嘗命汝諧與兄汝弼別產後弼廢其產諧泣請共居仲父子昭子玉貧病汝諧迎養甚謹事聞有詔旌表其門

劉德奉元人事繼母何氏如所生傭工取直寸錢尺帛皆

上之四弟並何出撫愛尤篤年五十未娶稱貧得錢先
爲弟求婦諸弟亦化其德一門藹然鄉里稱劉佛子
皇明

盛逮字景華吳江人自其父時以間右徙郡中洪武初
詔求賢才得對稱 旨 賜冠服使預論議與陳寧忤
乞歸及寧來爲蘇欲甘心焉乃令衡籍於里中俾以穀
入雖他所通必登之以滿其額逮爲竭力畢輸其友唐
當入金二百不能償逮又爲輸寧無以加罪而弟坐鹽
筴方見錄父憐其少逮逸之而身出就吏論徙夏州初
逮游秦晉間遇異人授方試之輒效年九十餘子寅以
醫顯

張甫明易州人父在時與叔鏞既異產三十餘年後鏞食不自支貨帛以給甫明日我家自足給人何貸他人物乎遂盡以家資匙鏞簿籍送叔及兄收掌畧無難色鄉人高其義

劉鈍上海人永樂間兄銑以會計事坐法繫京師鈍婚二日卽趣裝護行兄囚年餘思歸鈍陰乞守者代兄兄旣歸乃詒父母曰弟窘病道卒父母悲哀不已時刑部訪善字書者錄古文辭獄官知鈍能書以名上試之大稱意爲出其罪而禮遣焉比歸值夜午家人驚以爲鬼曰而餒欲求食吾當醮祭之鈍具言非鬼父母開門視之乃對泣道故兄自愧從後竇逸去然鈍亦不明兄之詒

已也後說有二子皆天鈍生四子名璵者以明易中已
卯鄉試累官建寧知府

梁崑星子人家常罹疫舉家逃避弟病危衆諭使棄之出
避崑曰如崑去弟誰視湯藥竟不去病亦不染人以友
義稱之

續文獻通考卷之八十一終

續文獻通考卷之八十二

皇明進士雲間王圻纂輯

節義考 義居 義徒 義友

義居

漢

蔡邕陳留人三世同居

崔挺清河人三世同居

晉

邵榮興武陵漢壽人與文獻叔八世同居後旌表門閭

汜雅春濟北人七世同財家人無怨色陶潛以訓其子

宋

吳元嗣江都人子孫壽皆百歲一門前後義聚不分

齊

封延伯字仲理濟渤海人三世同財爲北州所宗附

范安祖武陵人五世同居建元中旌其間

陳玄子義興人四世同居百有七十口建元三年表其門

間 又東海徐生之武陵李聖伯范道根五世同居零

陵譚弘寶衡陽何弘華陽楊黑頭四世同居蜀郡王績

祖華陽赫道福並累世同爨建武三年表門闕調

北魏

李凡安平人七世同居家有二十二房一百九十八口長

幼濟濟風化著聞表其門間

辛威隴西人五世同居

石文德中山人五世同居

王間北海客人數世同居百口共財產家門雍睦鄉里敬異有司申奏表門閭

王澤成縣人一門數千口六世同居

隋 郭雋太原人家門雍睦七葉共居犬豕同乳烏鵲同巢時人以爲義感之應州縣上其事高祖遣宇文昌平公詣其家勞問之

唐

劉君良饒陽人四世同居族兄弟猶同產門內斗粟尺帛無私隋大業末饑饉妻勸其異居因易置庭樹烏雛令聞且鳴家人恠之妻曰天下亂禽鳥不相容況人耶君

良郎與兄弟別處月餘密知其計因斥去妻曰爾破吾家召兄弟流涕以告更復同居天下亂鄉人多依之武德中深州別駕楊弘業至其居見六院共一庖子弟皆有禮嘆悵而去貞觀六年表其閭

榮璧河南濟源人開元二十四年河南尹崔元甫奏璧兩代同居凡四十餘口嘗割右股肉以療母疾及刺頂血寫佛經毋疾以瘳

張公藝壽張人九世同居齊隋梁皆旌表其門高宗封泰山還幸其宅問曰何以能九世不分公藝書忍字百餘以對

萬敬儒合肥人三世同居親喪廬墓大中間詔表其門州

改所居曰成孝鄉宋大中祥符間又旌異之

萬晏涇縣人以孝弟稱朝廷以數世同居表其門里并復其家

趙祚相州人八世同居詔賜旌表

高霞寓幽州人五世不異爨以孝謹稱

張珪衛州人七世同居詔賜旌表

崔邠武城人父時三世同居當時言治家者推其法

黃美蔡州人十世同居詔賜旌表仍蠲其課調

宋練高安人以孝聞四世同居咸通九年詔旌其門

王丕繁昌人數世同居里閭高其義睦聞于朝旌表其門

賜粟帛州縣歲存問仍復賦稅

鄧文瑞高安人四世同居五百餘口朝廷嘉之表其居曰
旌義

萬年宋興貴

奉先張孚

澧陽張仁興

博陵崔儒

濮州杜暹

櫟陽董思寵

湖城閻旻閻鄭

高平雍仙高

正平周思藝張子英

曲沃張君密秦德方馬玄操

李君則

太平趙德儼

隴西陳嗣

經城宋洸之

單父劉九江

無棣徐文亮

樂陵吳正表

河間劉宣董永

安邑任君義衡開

鄭縣王 緒寇元童

龍門梁神義賀見涉張奇異

舒城徐行周

睦州方良琨

桐廬戴元益

弋陽李植

以上皆數世同居天子旌表門閭賜粟帛州縣存問復
賦役有授以官者因無事實故特因地著名

五代

王仲昭六世同居旌表其門

李自倫深州人自高祖訓生粲粲生則則生忠忠生自倫
倫生光厚六世同居晉天福四年旌表門閭

王陶密州人五世同居世傳孝友

續文獻通考

卷之八十二

四

三

呂光簡北海人數世同居天子旌其門賜果帛有司存問
何千齡浦江人貞明初四代同居

韓德潞州屯留人兄弟累世同居

潘子直大庾人事父孝六世同居

南唐 張垵家繁昌千口同居

宋

徐承珪掖縣人與兄弟三人及其族三千口同居歷四十
年如一日所居里中木生連理瓜異蔓同實乾德間詔
名其鄉曰義感里曰和順

李昉深州人治家有法子孫守之數世不衰二百餘口同
居共爨田園邸舍所收及有官者俸祿皆聚之于廬

口日給餉婚姻喪葬所費皆有定數分命子孫掌其事
陳兢江州德安人伯宣之後唐僖宗時已六世不分南唐
復其家至昉之世宗族七百餘口太平興國初仍復其
家至兢之世子孫益衆淳化初詔每歲貸粟二千斛至
從弟旭旭弟蘊總家事仁宗賜爲本州助教同居十八
世家有百犬同牢食一犬不至諸犬皆不食

許祚德化人八世同居至祚七百八十餘口太宗時詔旌
表其門

田祚貝州人十世同居太平興國三年詔旌其門閭復其
家

李罕澄阜城人七世同居漢乾祐三年詔改鄉里名及旌

其門間太平興國六年復旌表之

胡仲堯奉新人累世聚居數百口雍熙二年詔旌其門間
張文裕陝州人六世同居淳化間詔表門間

趙廣八世同居淳化中詔旌其門

汪文諒旌德人與兄文政俱尚義輕利聚族千三百口天
禧中旌其門

洪文撫建昌人事親至孝六世同居至道中賜御書百軸
文撫遣弟文舉詣闕謝太宗飛帛一軸曰義居人以賜
之命所司舉爲江州助教旌表其門

王美蔡州人十七世同居咸平中旌表

楊榮麟州人七世同居咸平時旌表仍蠲課調

李宗祐大名人累世聚居至七百口咸平時臣下請加旌表從之仍蠲其課

曹遵趙州人六世同居咸平中詔旌表之仍蠲其課調方綱青陽人八世同居家屬七百口居室六百區每旦鳴鼓會食嘗出稻五千賑貸貧民景德中轉運使馮亮以聞詔旌其門

褒承詢會稽人居雲門山前十九世無異爨子弟習弦誦鄉里稱其敦睦大中祥符間優賜粟帛

丁雋醴陵人兄弟十七人義聚三百口家無間言大中祥符間表其門咸平後有常定軍孫浦襄州常元紹解州董孝章並十世同居莫州高珪永定軍朱仁貴潞州

邢濟相趙祚並八世同居隰州趙友開封亭居正潁州
趙可象衛州張珪滄州崔諒並七世同居邢州王覺六
世同居兗州童升京兆元守全平定軍段德並五世同
居亳州王子上四世同居大名陳宗祐宣州汪政潭州
季耕或聚居至七百口累數千百年並旌表之

東野宜曲阜人竇益乾封人各合居五六世有節行真宗
東封泰山時判兗州王欽若上言其義詔優賜粟帛
張化基閬州和楊忠義俱陝州人真宗祀汾陰時考制度
使馬起言化基等皆聚族累世孝弟可稱並降詔褒美
仍優賜粟帛

姚宗明河中承樂人自唐栖雲至德十六世同居自慶曆

以後又五十餘年而其家孝睦不衰

錢文卿樂清人方數歲執父喪如成人時三舍法行文卿方冠領郡學正諸生肅然敬之奉母居白石山閩族同居三十餘年無間言

張崇登熙寧進士自祖父以來義不析居內外千口閨門肅然無間言嘉祐中楊傑過其家大書義居二字遺之俞極宣城人乾道中寧國府上言其義居累世不析詔旌門閭弁復其家

吳志興楊子人世篤孝義歷七世三百年不分異積善好施鄉人稱爲吳善三高宗時爲廸功郎年九十三卒周欽若鉛山人數世同居慶元中旌表其門

張昌中漢陽人處家以義歷八世不分馮京有詩曰一水
滌涸繞沌村子房苗裔此間存同居八世三千口可憐
君恩未表門嘉定間事聞表曰義門

張仁遇開封人四世同居

樊可行劉閏俱陳州人王世及河陰人俱聚居至七百口
累數十百年所在請加旌表詔從之仍蠲其課調

陳芳河南人仕至大理丞一門十四世同居三百年孝義
爲時所重詔旌其門

顏詡吉州永新人真卿之後事繼母以孝聞一門千指家
法嚴肅

徐國和豐城人兄弟義居

上理子定孫願世盡孝道

宇文百之新井人性孝友數世不異居庭前六燕同巢紫
荆異本合幹人以爲孝友之感

瞿元肅南豐人四世同居家百五十餘口父歿兄弟六人
廬墓盡哀有司聞于朝詔旌表召元肅入見賜御書六
十二軸復其家

范芸軒德化人五世同居事聞旌褒蠲役

阮鍾儁銅陵人十一世同居朝廷嘉之

茅信卿泰州人四世同居家百餘口治家有法不率教者
輒笞之卒無怨言表爲四世孝義之門

徐行周舒城人數世同居詔旌其門賜粟帛州縣存問復
其賦稅

陸九韶金谿人累世同居家法嚴肅每旦家長率衆子弟一人長者爲家長一家之事聽命焉逐年差選子弟分任家事或主田疇或主租稅或主出納或主厨爨或主賓客公堂之田僅足給一歲之食家人計口打飯自辦蔬肉不合食私房婢僕各自供給許以米附炊每清曉附炊之米交至掌厨爨者置層交收飯熟按層給散賓至則掌賓者先見之然後白家長出見款以五酌但隨堂飯食夜則卮酒杯羹雖久留不厭每晨與家長率衆子弟致恭于祖禰祠堂聚揖于廳婦女道萬福于堂幕安置亦如之子弟有過家長會衆子弟責而訓之不改則撻之終不改度不可容則告于官屏之遠方晨揖擊

鼓三疊子弟一人唱曰聽聽聽勞我以生天理定若還
懶惰必饑寒莫到饑寒方怨命虛空自有神明聽又唱
云聽聽聽衣食生身天付定酒肉貪多折人壽經營太
甚違天命定定定

薛朋龜定海人祖父五世同居號爲義門至其孫通亦復
如是

薛觀字景荀鄞人聚族千指同居合食者五世人稱義門
薛氏

李庭芝字祥甫其先汴人十二世同居號義門李氏

毛仁魏縣人李文綱臨河人皆數世同居奉詔旌表門閭
賜粟州縣存問復其賦稅

徐文震金華人尚禮好義數世同爨德祐間丞相留夢炎署其門曰金華孝友

余起銅陵人一門義聚千三百餘口

張評事涇陽人五世同居男女百口總服同爨宋金兩朝勅命築義門臺旌表宅里

遼

張廷美前遼州錄事六世同居

劉興胤儀坤州人四世同居聖宗開泰元年各給復三年斬文貴慶州人八世同居詔賜職

達魯奚人三世同居咸雍十年賜官旌之

張寶錦州民四世同居太康四年命諸子三班院祇候

田世榮天德軍民三世同居壽隆六年詔官之命一子三班院祇候

元

向遜宜都人九世同居人無間言稱義門其十世孫存仁存禮早卒二妻俱守節至元中旌其門曰節義

楊一懷孟人至元間憐其叔清貧密以分契詣神祠焚之與清同居者三十年無間言有司以狀聞詔旌其家

張閏延長縣人八世不異爨家人百餘口無間言諸婦女聚一室爲女工工畢歛貯一庫無私藏幼稚啼泣諸母見者卽抱哺一婦歸寧留其子衆婦共乳不問孰爲己兒兒亦不知孰爲己母也閏兄顯率卽以家事付姪聚

聚辭曰叔父行也叔宜主之閨曰姪宗子也姪宜主之相讓既久卒以付聚至元二十八年旌表其門

趙毓管城人其先居唐州三世同爨毓官福州司獄滿歸以母老不復仕一日會諸弟泣申遺訓願世世無異處自是大小百口略無間言毓長兄瑞早卒嫂劉氏守志毓率家人事之甚恭次兄選繼歿嫂王氏毓母以其年少命嫁之王氏泣曰婦無再嫁之理願終事姑毓妹贅王佑佑率妹念佑母無子請歸養之孝友節義卒毓一門元貞初旌之

劉讓陽艾口人六世同居閨門四十餘口僅然無間大德元年表其門

王顯政蒲城縣民五世同居文宗天曆二年詔旌其門
任天祐武安人躬履忠信子孫七十餘人無敢積蓄四世
同居泰定三年表其門

王理蒲城人七世同居延祐天曆中表其門

鄭綺浦陽感德鄉人綺事父母孝綺生聞聞生運運生改
改生德珪德璋極友愛德珪生文嗣自綺至文嗣凡同
居六世歷二百年咸如綺在時至大四年旌表其間至
元元年太常博士柳貫又上狀請如故事復其家從之
德璋子太和司家事嚴而有恩雖家庭凜如公府自大
丞相及臺院諸公卿多賦詩美其行部使者余闕行縣
以其孝友七郡莫之先書東浙第一家以褒美之皇太

子聞其事曰國家之祥瑞也親御翰墨昇以鳳麟二大字勒石以傳家有二馬一馬出則一馬不食人以爲行義所感

張政臨漳人六世同居家口四十餘人各守禮法族黨稱其孝義有司以狀聞詔旌其家

田韋臯累世同居詔旌爲義門

李恭讓安平人累代同居旌其門曰義門

同山周氏金陵人自紹興至順帝時同居者九世歷二百餘年老幼千指功總以降幾至親盡朝夕聚處

王子覺浦江人四世同居

員從政葭州人累世同居

吳起孫高安人九世同居

陰幼遇奉新人五世同居

陳伯宣江州德安人子孫同居十餘世旌表爲義門

丁煦汴梁人八世同居

陳成字公美晉江人敦行孝友四世同居六葉相見監郡
僕王立表其門曰高年耆德扁其居曰衍慶

方時發青陽人綱之後十一世同居至時發克世其家以
孝義被旌起爲潮徽二州教授

張弘毅修武人七世同居一門孝友敦睦財無私蓄有連
理樹生焉詔旌其門所居之地名孝義鄉

羅世華字明遠慈谿人與弟世英弘惠天錫世昌一氣偕

老五世同居至正二十四年旌曰同居耆德羅氏之門
辛世顯字伯榮臨朐人年踰七旬日與弟宴集怡怡如也
老稚百餘口閨門肅雍人無間言同居五世人稱美之

休寧朱震雷

河南李福

真定杜良

建寧王貴甫

句容王容周成

鄆陵夏全

保定成珪

開平溫義

大同王瑞之

平陽湯文英

江州范士奇

涇州李子才

宿州王真

蕪湖芮世通 十世

陝州向存義 八世

曹州劉環 八世

以上皆元時累世同居者朝廷嘗表其閭或復其家

皇明

蕭與賢世家吉水娶族而同釜爨以居五世矣兄弟三人伯曰與賢仲曰與權季曰與恭雖遭值變故家日以削而孝友之風彌久益著諸子才皆克肖善守家法朝夕與諸孫力田服賈恭子弟之職而與賢教之以禮卽冠婚喪祭行之內外數百指莫不唯唯致謹邦之大夫士嘉之名其堂曰友恭

何執中南陵人洪武初襲父爵民兵萬戶與弟時中聚族同居九世不分

韓錦潞城人六世同居家衆凡四十餘人庭無間言同邑

李昇亦同居六世成化六年同受旌異

張嵩十世同居嵩宿遷順德鄉人其家自元時有始祖張榮凡八世同居成化七年有司上其事 詔表其閭逮今凡十世二百餘口云

虞訥樂平人五世同居有家範人無間言

廖秉綬廣昌人性友愛五世同堂婦入門無敢言分異者有司旌其門曰雍睦

李玘蒲圻人敦孝義子孫七世同居成化間表其門

王燾蘄水人七世同居少長三百餘口庭無間言 詔旌其門曰孝義

王宗義石首人五世同居長幼二百餘人藹然雍睦 詔

表其門

談錄武陵人自祖子隆以下曰文亮曰興曰惟福曰志貴
曰仲旻至錄十世不分居成化間事聞旌之今子孫數
傳猶守家規不變

石瑗武陵人祖庭河嘗著家訓約子孫同爨傳至邦達興
權應鳳子明和至瑗家益蕃衍人無間言孫偉鼎益守
其訓悖尚禮讓後知府陸瑯大書十世同居遺之家受
旌表

襄陵王五世同居嘉靖十一年 韓王聞于朝 命撰
勅遣官旌其門

義徒

漢

云敞字幼孺師事同縣吳章及章爲王莽所誅弟子千餘人盡更名他師時敞爲大司徒掾獨自劾吳章弟子收抱章屍歸殮葬之

王成太尉李固門生也初固知不免遣子基茲爕歸鄉里爕年十二姊文姬爲趙伯英妻密與二兄謀豫匿爕託言還京難作基茲皆死文姬乃告王成曰君執義先公有古人之節今委君以六尺之孤李氏存歿其在君矣成乃將爕入徐州界變姓名爲酒家傭而成賣卜于市陰相往來梁冀誅乃還鄉追行喪服及成卒爕以禮葬之四時則設上賓之位祠焉固死時又有弟子郭亮夫

冠上書乞收固尸不報與董班俱往哭臨不去會杜喬
故掾陳留楊匡號泣星行至洛托爲夏門亭吏守護尸
積十二日上書乞二公骸骨太后許之得歸塋

禮震平原人其師歐陽歛字正思樂安人坐賊下獄諸生
爲求哀者千餘人至有自髡剔者震年十七聞歛當斷
馳之京師行至河南獲嘉縣上書求代歛死而歛已死
獄中聞者義之

景毅蜀郡人靈帝時李膺坐鉤黨詣詔獄考死門生故吏
並被禁錮毅子碩爲膺門徒未及錄毅慨然曰本爲膺
賢遣子師之豈可漏名遂自表免歸時人稱之

任末奔師喪於道物故臨命勅兄子造曰必致我尸於師

門使死而有知魂靈不慙如其無知得土而已

吳 費慈宰意俱孫拯門人拯爲陸機司馬機爲孟玖等
所誣收拯考掠兩踝骨見終不變辭慈意二人詣獄明
拯冤拯譬遣之曰吾義不可誣在知故卿何宜復爾二
人曰僕亦安得負君拯死獄中二人亦死焉

晉 許孜字季義東陽吳寧人師事豫章太守會稽孔冲
受詩書禮易及孝經論語學竟還鄉里冲在郡亡孜聞
之盡哀負擔奔其喪送還會稽疏食執役制服三年

宋 游酢楊時俱程伊川門人一日侍伊川瞑目坐良久
而覺命之出二子乃出則門外雪深三尺

元 顧德玉字潤之構李人自幼從寧國路儒學教授今

觀光學觀光無子嘗語人曰吾昔寢疾于杭潤之侍湯藥情至切若父子醫爲之感動弗肯受金今我行且老必託之以死既而訪醫吳中病且革趣舟歸潤之進次尹山卒明日乃至攜李潤之奉其屍歛于家衰經就位邦人士爲潤之來吊者潤之拜之越明年塋于海鹽近顧氏之先塋歲時祭享惟謹

以上係師弟

義友

春秋 鮑叔牙與管仲相善仲嘗言曰吾嘗仕而見逐鮑叔不以我爲不才知我時不遇也吾嘗與鮑叔賈分財多自取鮑叔不以我爲貪知我貧也吾嘗三戰三北鮑叔不以我爲怯知我有老母在也生我者父母知我者

鮑叔也

戰國

左伯桃羊角哀皆燕人聞楚王善待士乃同入楚值雨雪糧少桃自以能不如哀乃弁糧與哀令往事楚自餓死于空樹中哀至楚爲上大夫乃言於楚王備禮以葬伯桃

青井趙人趙襄子游於囿中至於梁馬却不進青井爲參乘襄子進視梁下有人青井視梁下豫讓却寢佯爲死人叱青井曰去長者吾且有事青井曰少而與子友子且爲大事而吾言之是失相與之道子將賊吾君而我不言之是失人臣之道如吾者惟死爲可適乃退而自

殺

漢

范式字巨卿山陽金鄉人少遊太學與汝南張元伯劭爲友並告歸鄉里式謂元伯曰後二年當還將過拜尊親乃共尅期至期元伯具以白母請設饌以俟之母曰二年之別千里結言爾何相信之深耶曰巨卿信士必不相違巨卿果至升堂飲酒盡歡而別後忽夢劭呼曰巨卿吾以某日死某時塋豈能相及耶式恍然覺悟悲嘆泣下素車白馬馳往赴之未至而喪已發柩不前進母曰此必爲巨卿耳巨卿既至叩喪車言曰行矣元伯死生異路未從此辭執紼引柩於是乃前巨卿至墓爲修

塚樹乃去

雷義字仲弓豫章人順帝時舉茂才讓與友人陳重刺史不聽義遂佯狂被髮走不應命鄉里爲之語曰膠漆自謂堅不如雷與陳

范丹字史雲陳留人與同郡尹苞友善二人居貧出入共一單衣到人戶外尹年長常先著衣入須臾出解衣史雲終無間言

習脂京兆人與孔融善每戒其剛直太過及融爲曹操所害舉族皆夷許下莫敢收者習往撫尸曰文舉舍我死吾何用生爲遂收葬焉操欲殺脂旣而赦之

吳 吳範字文則孫權時拜騎都尉素與魏滕同邑相善

滕嘗有罪孫權責怒甚嚴令敢有諫者死範謂滕曰與子偕死滕曰死而無益何用死爲範曰安能慮此坐觀汝耶乃髡頭自縛詣門使鈴下以聞鈴下曰死不敢白範曰汝有子耶曰有曰使汝爲吳範死子以屬我鈴下乃排闥入言未卒權大怒欲投以戟遽巡走出範因突入叩頭流血言與涕並良久權意乃釋免滕滕見範謝曰父母能生長我不能免我於死丈夫相知如汝足矣何用多爲

劉宋 蔡興宗宋孝武踐祚累遷尚書吏部侍郎竟陵王誕據廣陵爲逆事平興宗奉旨慰勞廣陵州別駕范義與興宗素善在城內同誅興宗至躬自收殮致喪還豫

章上聞謂曰卿何敢故爾觸網興宗抗言答曰陛下自
殺賊臣自莖范義既犯嚴制終當并於斧鉞耳帝有慙
色

唐

狄仁傑字懷英太原人爲并州法曹參軍同府參軍鄭崇
質當使絕域母老且疾仁傑謂曰君可貽親萬里憂乎
詣長史藺仁基請代行仁基咨羨其誼時方與司馬李
孝蕪不平相語曰吾等可少愧矣遂相待如初

柳宗元字子厚河東人與劉禹錫相善及以罪同貶宗元
得柳州司馬禹錫得播州司馬播州非人所居而禹錫
親老宗元草疏將以柳易播會裴度請于上得改連州

乃止

道琮蒲州人慷慨尚義貞觀末徙嶺南有友人同斥者死
荆襄間臨終泣曰人生有死獨委骨異壤可恨耳道琮
曰吾若還終不使君獨留此瘞路左去歲餘遇赦歸以
積潦失殯處道琮痛哭諸野波中忽若盆沸道琮曰若
屍在再沸祝已水復沸乃得屍載還鄉

宋

韓億靈壽人與龍眠李若谷爲友億登進士選縣尹將之
任億自推毋車若谷推其妻車將近縣吏卒來迎乃止
億割敝襦分半弁餘金與之涕泣而別兩家子弟繼好
不絕若谷明年登第

侯可字無可華州華陰人隨計入京里中醖金贖行比還
悉散同舉者曰此金鄉里所以資應詔者不可爲他利
且行聞鄉人病念曰吾歸則彼死矣遂留不去病者愈
以已馬載之徒步而歸可與申頴爲友頴病重千里求
醫未歸而頴卒目不瞑人曰其侍侯君耳且殮而可至
撫之乃瞑頴無子不克葬可辛勤百計鬻衣相助卒葬
之方天寒單衣以居有饋白金者顧頴之妹處室舉以
佐其奩具一日自遠歸家以寢告適友人郭行叩門曰
吾父病醫邀錢百千賣吾廬而不售可惻然計橐中裝
畧當其數盡與之關中稱其賢

巢谷眉山人舉進士學古兵法游西邊與河州將韓存寶

善存寶坐罪死谷逃江淮會赦乃出紹聖時蘇軾及弟
轍貶嶺海谷徒步往訪時年已七十餘矣見轍握手道
平生將復見軾于海南轍止之不從又自循至儋至新
遂病而死轍聞哭之曰谷于朋友之義無愧高恭惜不
遇裏子而前遇存寶後遇余兄弟也

蔣淦零陵人少辭家入太學後歸隱黃庭堅在宜州病革
淦往見焉庭堅委以身後事及卒爲棺殮具舟送歸鄒
浩謫永州淦從之游浩有昭州之行淦又爲經紀其家
田畫王回曾誕皆鄒浩友也浩諫立劉后事被謫畫迎之
浩流涕畫正色責曰使志完隱默不言官京師遇寒病
五日不汗死矣豈獨嶺海之外能死人哉願君毋以此

舉自滿士所當爲者未止此也浩謝之初浩將諫告于王回回曰事有大于此者乎子雖有母然移孝爲忠亦太夫人素志也及浩南遷人莫敢顧回歛交遊錢爲浩治裝且慰安其母選者以聞逮詣詔獄曾誕嘗三以書勸浩論孟后事浩不報及浩廢誕作玉山主人對客問以譏浩不能諫孟后之廢而俟過舉乃言爲不知幾云錢應高溧陽人景炎中虜陷建康時故人趙淮宿于其家爲虜所執應高聞淮死追悔不及乃哀號投荆溪中死張毅文字子載廬陵人丞相文公友也公貴顯時屢以官辟不就江南既屬元公自廣還過吉州城下毅文來見曰今日丞相赴北吾當偕行既至燕寓于公囚所側近

日以美饌餽凡三載始終如一且潛製一櫝公刑日即
以藏其首復訪求公之室于俘虜中俾出焚其屍收拾
骸骨襲重囊與先所函櫝負之南歸赴公家塋焉

元

陳旅莆田人初至京師感虞集爲知己及提舉湘江儒學
時集歸田已數載歲且大比請于行省叅知政事字
魯卿親奉書幣請集主文鄉闈欲爲問候計乃衝冒炎
暑千里訪集于臨川集感其來留旬日而別惓惓以斯
文相勉惓然若將永訣焉集每與學者語必以旅爲平
生益友也一日夢旅舉杯相向曰旅甚思公亦知公之
不忘旅也但不得見耳已而旅果卒集慟之不置

皇明

陳汝同號古菴爲國子祭酒致仕與翰林修撰梁禔

禔永樂甲

辰進士同里居一日禔有病語其家人曰朋遊中惟隣

居同年陳汝同心地好且有家法孤子女可托也及禔病篤先生往視之已不能言惟指以手左右具述其言古菴垂泣諾之及禔卒凡子女居第嫁娶等事皆先生經理之始終如一冒物議不計也禔女得適黃瑜瑜爲肇慶大守以其事告葉文莊公嘆曰友道彫喪久矣如陳先生可多得也哉

雍泰字世雍陝西咸寧人性廉厲凜不可犯正統天順間爲山西副使至都御史巡撫宣府泰既貴過家往訪同

窓舊友王生時生已棄士業農矣遇諸塗謂曰雍泰乃
念貧賤之交乎倘不棄予約期訪汝泰敬諾而歸至期
冠帶以俟生布衣毳毳背隻鷄持瓢酒至據正席而坐
泰以兄事之與飲必跪生亦直受之不辭蓋中原西北
士大夫長幼之禮其歲年長者每呼姓名或獻酬幼者
必跪初不計貴賤也西土風俗亦厚矣哉

陳循與高穀俱景泰同學士穀娶夫人性極妬悍長而無
出及置一妾禁不容入寢一日循過留酌因談及此夫
人屏後聞之即出詬陳公陳公掀案怒起以一棒撲夫
人仆地至不能興高力勸乃止因數之曰汝無子法當
黜今不黜汝而置妾汝復聞之是欲絕其後也汝不改

吾當奏聞 朝廷置汝于法自是茹少衰其後高公得御妾生于岷廕中書舍人皆陳公一怒之力亦義舉也